

Odluka o izmjenama i dopunama Odluke o osnivanju Komisije za državnu imovinu

Koristeći se ovlaštenjima koja su visokom predstavniku data članom V Aneksa 10 (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini prema kojem je visoki predstavnik konačni autoritet u zemlji u vezi sa tumačenjem gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik “pomaže, kada visoki predstavnik to ocijeni neophodnim, u rješavanju svih problema koji se pojave u vezi s implementacijom civilnog dijela Mirovnog ugovora”;

Pozivajući se na stav XI.2 Zaključaka sa konferencije Vijeća za implementaciju mira održane u Bonu 9. i 10. decembra 1997. godine, u kojima je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim “donošenjem obavezujućih odluka, kada to ocijeni neophodnim”, o određenim pitanjima, uključujući i (prema tački (c) stava XI.2) “mjere kojima se osigurava implementacija Mirovnog sporazuma na cijelom području Bosne i Hercegovine i njenih entiteta”;

Prisjećajući se takođe da se Deklaracijom Upravnog odbora Vijeća za implementaciju mira na nivou političkih direktora, u Sarajevu 24. septembra 2004. godine, zahtijevalo iznalaženje “trajnog rješenja” u vezi s “pitanjem državne imovine”;

Konstatirajući da je, na osnovu navedenog, Komisija za državnu imovinu, utvrđivanje i raspodjelu državne imovine, određivanje

prava i obaveza Bosne i Hercegovine, entiteta i Brčko Distrikta Bosne i Hercegovine u upravljanju državnom imovinom (u daljem tekstu: Komisija), u čijem se sastavu nalaze stručnjaci predstavnici iz oba entiteta Bosne i Hercegovine, Brčko Distrikta Bosne i Hercegovine i institucija Bosne i Hercegovine, formirana u decembru 2004. godine Odlukom Vijeća ministara Bosne i Hercegovine ("Službeni glasnik Bosne i Hercegovine", br. 10/05);

Konstatirajući takođe da su zakonima kojima se privremeno zabranjuje raspolaganje državnom imovinom Bosne i Hercegovine, entiteta ili njihovih administrativnih jedinica, iziskuje proširenje nadležnosti Komisije, čime joj se omogućuje da, na prijedlog zainteresiranih strana, odlučuje o izuzecima za određenu državnu imovinu;

Uzimajući u obzir to da se mehanizmom donošenja odluka u okviru Komisije, u kontekstu dodatnih nadležnosti koje su joj zakonom dodijeljene, moraju na adekvatan način štititi interesi Bosne i Hercegovine, Brčko Distrikta Bosne i Hercegovine, entiteta i njihovih administrativnih jedinica; i

Uzimajući u obzir također da svako proširenje nadležnosti Komisije iziskuje i produženje roka u okviru kojeg je Komisija dužna izvršiti sve povjerene zadatke, uključujući i izradu prijedloga zakona odnosno završnog izvještaja;

Uzevši u obzir, konstatirajući, te imajući na umu sve prethodno pomenuto, visoki predstavnik donosi sljedeću:

ODLUKU

o izmjenama i dopunama Odluke o osnivanju Komisije za državnu imovinu, utvrđivanje i raspodjelu državne imovine, određivanje prava i obaveza Bosne i Hercegovine, entiteta i Brčko Distrikta Bosne i Hercegovine u upravljanju državnom imovinom

koja se nalazi u prilogu ove Odluke i čini njen sastavni dio.

Navedene izmjene i dopune Odluke stupaju na snagu odmah, na privremenoj osnovi, sve dok ih Vijeće ministara Bosne i Hercegovine ne usvoji u istom obliku, bez izmjene i dopune i bez dodatnih uvjeta.

Ova Odluka stupa na snagu odmah i odmah se objavljuje u "Službenom glasniku Bosne i Hercegovine".

Sarajevo, 18. mart 2005.

Paddy Ashdown

Visoki predstavnik

ODLUKU

o izmjenama i dopunama Odluke o osnivanju Komisije za državnu imovinu, utvrđivanje i raspodjelu državne imovine, određivanje prava i obaveza Bosne i Hercegovine, entiteta i Brčko Distrikta Bosne i Hercegovine u upravljanju državnom imovinom

Član 1.

U odluci o osnivanju Komisije za državnu imovinu, utvrđivanje i raspodjelu državne imovine, određivanje prava i obaveza Bosne i Hercegovine, entiteta i Brčko Distrikta Bosne i Hercegovine u upravljanju državnom imovinom ("Službeni glasnik Bosne i Hercegovine", br. 10/05, u daljem tekstu: Odluka), iza člana 4. dodaje se novi član 4a. koji glasi:

"Član 4a.

Komisija posebnom većinom odlučuje, na prijedlog zainteresirane strane, o izuzimanju određene državne imovine od zabrane propisane zakonima o privremenoj zabrani

raspolaganja državnom imovinom na nivou Bosne i Hercegovine, Federacije Bosne i Hercegovine i Republike Srpske.

U smislu primjene stava 1. ovog člana, posebna većina je minimum od tri (3) glasa predstavnika institucija Bosne i Hercegovine i po tri (3) glasa iz svakog od entiteta. ”

Član 2.

Član 9. stav 3. mijenja se i glasi:

“Komisija donosi odluke i usvaja prijedloge kvalificiranom većinom glasova prisutnih članova.

U smislu primjene stava 1. ovog člana, kvalificirana većina glasova je minimum od tri (3) glasa predstavnika institucija Bosne i Hercegovine, po tri (3) glasa iz svakog od entiteta i jedan (1) glas iz Brčko Distrikt Bosne i Hercegovine.”

Član 3.

Član 10. mijenja se i glasi:

“Komisija je dužna da do 30. novembra 2005. godine izradi završni izvještaj o radu za predsjedavajućeg Vijeća ministara i/ili ponudi nacрте odgovarajućih zakonskih akata u istom roku.”

Član 4.

Ova Odluka stupa na snagu odmah i odmah se objavljuje u “Službenom glasniku Bosne i Hercegovine.”